

欽
定
全
唐
文

欽定全唐文卷四十九目錄

代宗

四

答顏真卿謝戶部侍郎批

答顏真卿謝吏部侍郎批

答顏真卿謝荆南節度使批

冊和回紇公主文

冊新羅王太妃文

冊獨孤穎長女爲貴妃文

冊華陽公主文

冊親王出將文

冊鄭王邈爲天下兵馬元帥文

冊普寧公主文

傳位皇太子冊文

即位赦文

冊尊號赦文

南郊赦文

改元永泰赦文

改元大厯赦文

大厯八年夏至大赦文

大厯九年夏至大赦文

新翻護國仁王般若經序

密嚴經序

欽定全唐文卷四十九

代宗_四

答顏真卿謝戶部侍郎批

卿門傳儒行代挹公才忠義在躬幹蠱從政頃升八座式
昭水鏡之規往鎮兩河能鳴風雨之晦比雖因事見貶今
則念舊錄功然以地官務殷惟才是屬周行所舉殊愜朕
懷所謝知

答顏真卿謝吏部侍郎批

卿鬱然詞宗雅有朝望高標勁節歷霜霰而不渝握鏡懸

欽定全唐文

卷四十九

代宗

衡鑒人倫而式敘是用特加命數光乃純臣復銀青之舊
階鳴水蒼之雜佩佇聞密啟以定九流舉其朝綱僉曰惟
允所謝知

答顏真卿謝荆南節度使批

卿明邁偉才忠貞壯節夙推公器累踐周行專城高魏尚
之勛會府著山濤之績而七澤交帶三江要衝式資統尹
之方雅屬旌旄之寄人存政舉其在茲乎所謝知

冊和回紇公主文

維大歷二年歲次丁未五月己酉朔十三日辛酉皇帝若

曰帝乙歸妹表於易象魯侯築館列在春秋咨爾第某妹
雲漢之姿聯華宸極河洲之德著美公宮整玉笄於錦車
題銀榜於毳幙善修嬪則載叶蕃情實資輔佐之功廣我
懷柔之道烏孫下嫁已申飾配之儀紅綬增榮爰寵䟽封
之命是用冊曰某公主敬承徽禮可不慎歟

冊新羅王太妃文

維大厯三年歲在戊申二月景子朔十日乙酉皇帝使某
官某持節冊命曰於戲子承家嗣作藩輔之臣母加尊號
蓋春秋之義咨爾新羅王金乾運母素推勲閎雅有華風

其德可尚其儀可則鑒於圖史式是禮容儷東方君子之
國處中壺貴人之位事上以敬接下以仁睦我親隣亦資
內助有教子之明訓膺繼代之新命固可以崇峻徽章光
昭盛禮是用冊爲新羅王太妃修乃慈範撫其嗣君永懷
前人無改其道欽承典冊可不慎歟

冊獨孤穎長女爲貴妃文

維大厯三年歲次戊申月日皇帝遣使某官某冊命曰於
戲位亞長秋坐論婦道聽天下之內治序人倫之大端御
于邦家式是風化惟爾贈禮部尚書獨孤穎長女祥會鼎

族行高邦媛體仁則厚履禮維純有冲敏之識不資姆訓
有淑慎之行自成嬪則蘊此貞懿灼其芳華選躬之初奉
承先命肅恭之儀克稱尊旨鑒與比幸侍從勤誠祗事壽
宮備申哀敬能盡其節實同我心久奉椒塗載揚蕙問勤
於道藝每鑒圖書動有箴規必脫簪珥進賢才以輔佐知
臣下之勤勞謙讓益勤記功惟最聲流彤管道洽紫庭克
副宮教敬修壺職眷求賢淑用峻等威百辟抗辭六宮歸
美宜崇禮冊俾舉彝章是用冊曰貴妃往欽哉無或居上
而驕無或處貴而逸降情以逮下誠事以防微潔其粢盛

服其澣濯敬循禮節以率嬪御膺茲嘉命可不慎歟

冊華陽公主文

維大厯四年歲次己酉三月壬申朔五日子景子皇帝若曰
漢家舊制諸女皆封儀服比於藩王膏腴封其井賦咨爾
第某女承徽自遠誕秀增華仁孝才明夙有天資之慶言
容法度成於壺教之慈敏達知微周旋中節肅雍是憲婉
靜流芳雖僅在韶年禮未主於同姓而載揚淑問德已冠
於成人宜錫典章用䟽國邑是用冊曰某公主欽承徽命
可不慎歟

冊親王出將文

維大厯五年歲次庚戌三月丁巳朔十六日壬申皇帝使
某官乙持節冊命曰於戲昔武德貞觀之際親賢兼敘中
外大寧多以藩王委之方面元宗震耀威武外攘夷狄亦
選建明德時維鷹揚予之珪瑞並賜旌鉞祇奉前訓敢忘
夙夜爰命小子統茲元戎某英茂有才寬簡彰信豈孝恭
之外至亦禮讓而中發能辨雅樂尤精善書言表於微獨
有所得事迫於悔未嘗復行時因講義之餘兼達理戎之
要固可總以文武屏於家邦屬河外名都方缺上將難於

大任歷選中朝雖慙知子之明不忝安邊之寄錫以戎輅
分以兵符撫其四封式是羣帥仍求素望俾副新軍爾其
保靖疆土惠安氓俗服我明訓永孚于休

冊鄭王邈爲天下兵馬元帥文

維大歷六年歲次辛亥五月壬辰朔十六日丁未皇帝使
某官某乙持節冊命曰於戲周之藩翰選用宗盟則懷德
惟寧大邦惟屏也漢之郡國分建子弟則燕代邊遼齊趙
漸海也莫不賦兼千乘土過數圻賜鈇鉞以專征參卿士
而夾輔拜之於廟命之於庭俾其外合羣后同獎王室是

用師古率由至公鄭王邈幼奉君親之訓兼承保傳之戒罔敢失墜勤而行之忠肅孝恭資其令德溫良聰達輔以多才辨正五經之儒采述三雍之樂不自矜尚過於謙沖周旋體仁恒久其道懿此休問流於四方朕往統藩旄嘗親戎略諸子侍從或有所聞時與之言頗詳其旨必能當我朝制叶予師貞仍選輔車委闕留府錫以彤弓之寵稱其綠車之尊爾其大訓六師以率諸夏敬茲厥服無廢朕命

冊普寧公主文

維大歷七年歲次壬子七月庚辰朔十六日乙未皇帝若
曰於戲春秋之義下嫁之禮主于同姓送以上卿克明大
倫協用彝典咨爾普寧公主孝敬閑婉朗然夙成法度言
容資於內訓詞禮是則令淑增華封魯之榮已開湯沐適
齊之美更洽肅雍寵爾有行舉茲成命今遣使金紫光祿
大夫門下侍郎同中書門下平章兼宏文館大學士知館
事充太清宮使上柱國齊國公王綰持節禮冊爾其奉公
宮之教和邦族之姻載揚夙徽永作來範敬承明誠可不
慎歟

傳位皇太子冊文

維大厯十四年歲次己未五月辛丑朔二十三日癸亥皇
帝若曰於戲昊天有命皇王受之立嫡以賢春秋之義傳
歸於子漢氏成規宗廟社稷實賴其慶咨爾皇太子迺稟
天地之仁合日月之耀道光三善孝著十倫頃者國步多
艱委以戎律理軍靖難保大定功克復帝圖廓清妖孽旣
表建侯之業俾承守器之重仁孝之德夙夜惟寅朕天命
有終弗興弗寤非至公無以主天下非至德無以臨四海
是用命汝陟於元后嗣守皇業上繼宗祧下安羣望其令

門下侍郎同中書門下平章事常袞奉冊即皇帝位於戲
宜遵太宗之法度肅宗之儉約任賢勿貳去邪勿疑與衆
守邦祗敬予訓

即位赦文

高宗嗣興諒闇成受終之禮康王承統翌日奉顧命之書
況萬事尚殷蕭牆有釁蒼生佇理社稷謀安教雖達於通
喪禮有變於金革順人聽政儻勉從權朕頃侍鑾輿率彼
西夏佐成草昧俾掌戎車國步艱難睿圖廣運再清寓縣
崇復宗社稟成命以受律敢貪天以爲功聖慈宏深冊踐

明雨奉若庭訓敢有怠心嗚呼不弔昊天殃咎荐至皇祖
之哀未釋閔凶之罰奄鍾攀號罔極若無天地誓終喪紀
企及前王百辟抑予俾恭遺訓俯遂衆望嗣膺丕烈欽茲
大寶懼不勝任若蹈春冰如集喬木邇日者先聖哀損朕
在問安而閭牆構災陵長成禍閭闔作孽閭寺滔天職爲
亂階潛置巫蠱將行竊弄覆我邦家賴良弼翊戴爪牙同
德天道助順神理害盈昭此共工之心終貽管蔡之辱舍
彼有罪咸伏其辜廢於離宮寘於城潁今天衢雖泰率土
未康式協公卿之心仰遵易月之命奉時斯在先甲未孚

宜允人神覃茲渙汗可大赦天下自寶應元年五月十七日昧爽已前大辟罪已下已發覺未發覺已結正未結正繫囚見徒常赦所不免者罪無輕重咸赦除之自開元已來所有諸色犯累者並宜雪免左降官並諸色流人及罰鎮効力配軍團練等一切即放還其中有見任刺史縣令及正員者並依本任其四月十五日已後諸色流貶者與量移近處逆賊史朝義已下有能投降及率衆歸附者當超與封賞天下禁囚不得過五日所有推劾不得分外拷掠亦不得信支證便結罪名諸色文武官應在凌霄門內

謁見者并飛龍射生等並宜以寶應功臣爲名諸州刺史與一子官刺史縣令入五品減兩考內外文武官三品已上賜爵一級四品已下各加一階諸州刺史父母在無官者與致仕官及父母邑號已亡歿者追贈諸州防禦使并停天下子爲父後者各賜勲一轉州縣官自今已後宜令三考一替太官饗膳等特宜減省有涉奢侈一切宜停天下百姓逋租懸調貸糧種子諸色欠負官物一切放免開元乾元等錢並宜準一文用不須計以虛數益昌郡王邈進封鄭王延慶郡王迴進封韓王故庶人皇后王氏故庶

人太子瑛鄂王瑤光王琚宜並復封號棣王炎永王璘及
應安祿山誣誤反狀人等並宜昭雪建昌王追封爲齊王
崇恩王追封爲衛王靈昌王追封爲鄆王其有明於政理
博綜典墳文可經邦謀能制勝及孝悌力田諸州刺史並
宜搜揚聞薦投匭者不須勘以停處姓名務招直言以副
朕意

冊尊號赦文

惟高祖太宗敷大德於天下覆載之內湛恩茂育累聖同
道用康兆人寶位重光深其德澤被服漸漬洽於生靈者

百有五十年之閒兵不作而刑將措矣自寇虐橫厲山東
不開釁起渠魁毒流區宇三軍七萃之士豪傑忠良之徒
制在風波遭其驅劫繇是干戈不息征賦寔煩哀我人斯
並罹災患憫茲有犯無罪萬方朕上戴皇天下臨黔首奉
先聖之成命集一切之大勲元惡旣誅羣生思乂是欲鏡
清六合網浹八紘庶齊大道之時克復太平之理至化猶
鬱兵嚴初解百辟卿士中外衆臣並進昌言請上徽號曰
寶應元聖文武孝皇帝朕涉道日寡慚德良多恐沮樂推
之心自增神器之重俯膺典冊敬受鴻名便欲謁報昊天

展事郊廟又以孟秋多稼垂及西成王畿之間人實勞止
輟茲大禮式候元冬切爲踰年改元之制續承洪業敢廢
舊章博採羣公之義乃貞協用之紀其實應二年改爲廣
德元年爰屬履端乃宏肆眚赦茲湯火俾雲行而雨施滌
其瑕穢將玉振而金聲宜廣更始之恩用明嚮勸之福可
大赦天下自廣德元年七月十一日昧爽已前大辟罪無
輕重已發覺未發覺已結正未結正繫囚見徒常赦所不
免者咸赦除之左降官即量移近處亡官失爵各與收敘
諸色流人罰鎮効力安置配隸等一切放還其安祿山史

朝義親族應在諸道一切原免並無所問天下所有諸色結聚羌渾党項但能悔過自陳各歸生業一切並捨其罪其中有頭首能勸率并束手來歸者并加官賞仍令本道防禦使并管刺史縣令分明曉諭所有到者各具名錄奏諸道百姓逋租懸調及一切欠負官物自寶應元年十二月三十日已前並放免一戶之中有三丁放一丁庸調地稅依舊每畝稅二升天下男子宜二十五成丁五十五入老應徵租稅刺史縣令據見在戶徵科其逃亡死絕者不得虛攤隣保河北百姓復三年應是回紇行營經歷處免

今年租稅内外文武三品已上賜爵一級四品已下加一階仍各賜兩轉天下兵馬元帥雍王智謀夙成忠孝純至恭行討伐親統元戎撫外蕃以仁訓羣帥以義班師獻捷勲茂武成宜兼尚書令加實封二千戶迴紇可汗冊爲頡咄登密施合俱錄英義建功毗伽可汗可敦冊爲娑墨光親麗華毗伽可敦可汗及左右内外宰相已下共加實封二萬戶令御史大夫王翊持節就衙帳冊禮左右殺胡祿都督等並封爲王諸部督並封國公河北副元帥懷恩宜兼太保仍與一子二品官一子四品官並階更加實封五

百戶河南副元帥光弼與一子三品官並階更加實封三百戶幽州節度使懷仙與一子三品官並階加實封二百戶李抱玉郭英乂辛雲京侯希逸田神功孫志直白孝德令狐彰並各與一子五品官並階加實封二百戶李寶臣薛嵩田承嗣張獻誠等各與一子五品官並階仍加實封二百戶魚朝恩寄崇師律程元振勲高佐命各加實封二百戶仍與一子五品官並階僕固瑒高彥崇渾日進李建義李光逸楊崇光李懷光張如岳白元光溫如雅拓拔澄泌高暉盧欽友成惟良曹楚玉等各與一子五品官加實

封一百戶仍各賜鐵券以名藏太廟畫像於凌烟閣并寇
難已來將相勲業高者其名籍圖畫亦準此子儀與一子
四品官并階加實封二百戶苗晉卿劉晏裴遵慶元載各
與一子四品官並階加實封一百戶儀王及彰王已下男
未官者並準舊例與官及封永穆並長樂已下長公主及
郡縣主嗣王郡王等各與一子官皇親五等已上諸親三
等已上各與一子出身二王後各與一子官諸道節度觀
察使立功將士其父兄在無官者依子文武與官已歿者
追贈陣亡將士襲父官爵河北河南有懷材抱器安身守

節素在邱園不仕爲衆所知委所在長官具名聞薦應授
僞官等並已昭洗矜寸宥過宜有甄收委所繇勘本官名
銜資歷聞奏量才處分文武正員常參官並諸州刺史父
母無邑號官者宜與致仕官及邑號贈者更與改贈刺史
縣令自今以後改轉刺史三年爲限縣令四年爲限員外
及攝試官一切不得釐務諫官每月上封事無所迴避河
南河北僞度僧尼道士女冠並與正度天下刑獄須大理
正斷刑部詳覆不得中書門下即便處分諸色人中有孝
弟力田經術通博文詞雅麗政理優長本州各以名薦

南郊赦文

惟我高祖太宗之有邦罔不昭事於上帝嚴恭敬畏與神
合符七聖在天眷命永固朕嗣守鴻業敢忘奉先尚質貴
誠聿修盛典頃以四方多難責在朕躬建侯行師日不暇
給東擒羯胡之首西禦犬戎之患元元告病社稷阡危內
定外攘不遑展禮雖高明未達而精意惟勤克通至誠以
錫純嘏番戎即敘弓矢載櫜虔奉泰壇鑒寐接神祇之顧
永保宗社歲時結霜露之思近又百辟在庭儼然而進奉
請元子以居少陽冊命乃行匕鬯攸主按風雨之清道乘

星火之仲春朝於元元格於藝祖躬執珪奠祇見南郊天
何言哉神所勞矣敷兆人之戢穀廣四達之聰明式重燔
柴之經益申解網之惠可大赦天下自廣德二年二月二
十一日昧爽已前大辟罪無輕重已發覺未發覺已結正
未結正繫囚見徒常赦所不免者咸赦除之左降官即與
量移近處亡官失爵放歸不齒之類並官已復資未得本
階者各量與收敘諸色流人及量移人並罰鎮効力配隸
等一切放還自兇孽亂常王室多難干戈不息今已十年
軍國務繁關輔尤劇念茲疲耗久困徵科其京城諸司諸

使應配曠騎官散官諸色丁匠幕士供膳音聲人執祭齋
郎問事掌閑漁師並諸司門僕京兆府騎丁屯丁及諸色
納資人每月總八萬四千五十八人數內宜每月共支二
千九百四十四人令河東關內諸州府配不得偏出京兆
府餘八萬一千一百一十四人并停所須衛役使宜撙節
定數官給資錢不得干擾百姓其寶應元年十二月三十
日已前諸色欠逋在百姓腹內者并放免天下戶口宜委
刺史縣令據見在實戶量貧富作等第差科不得依舊籍
帳據其虛額攤及鄰保其天下諸州府長史及縣令有清

白著聞善政稱最能招輯逃亡編附復業戶口增多者具
狀聞奏朕當差人按覆與所舉狀同者超資進改天下所
有諸色結聚及羌渾党項等能悔過自陳各歸生業一切
并捨其罪其中有能率先來降者仍特加官賞征人不息
勤戍斯久丁壯疲弊老弱困窮光武有言頭鬚爲白戢藏
鋒刃牧養元元方面重臣宜悉朕意應諸州團練將士等
委本道節度及諸防禦使等審與州府商議如地非要害
無所防虞其團練人等並放營農休息寇戎以來積有年
歲徵求數廣彫弊轉深自今已後除正租稅及正勅并度

支符外餘一切不在徵科限內外文武官三品已上賜爵一級四品已下各加一階仍並賜勲兩轉武德元從功臣勲業特崇子孫沈翳者委所司勘責各與一人官成都靈武元從普恩之外三品已上更賜一級四品已下更加一階寶應功臣普恩之外三品已上各與一子六品官賜爵一級四品已下各加兩階更賜勲兩轉五品已上官子爲父後者賜勲兩轉副元帥光弼子儀各與一子三品官并階諸道節度使各一子五品官并階都防禦使及經略等使各與一子六品官并階去歲行幸陝州六軍英武威遠

威武寶應射生衙前射生左右步軍等并内外文武百官
扈從到行在者三品已上與一子官四品已上各加兩階
自陝州至上都已來置頓使及州府長官普恩之外各與
一子出身置頓使判官已下緣路縣令及專知置頓官各
加一階其六軍神策寶應射生衙前射生及左右步軍英
武威遠威武等諸軍左右金吾將士緣大禮扈從及在城
留後者共賜錢五萬貫鴻臚蕃客共賜錢一千貫儀王及
彭王已下諸王男未有官者並準舊例與官其已封爲郡
王國公者及永穆長樂已下長公主及諸郡縣主並嗣王

郡王各與一子官皇親五等已上諸親三等已下各與一子出身二王之後各與一子官臺省之官事資履歷刺史縣令任在親人職務所更是爲理本其左右丞侍郎御史中丞等取曾任刺史者郎官亦取曾任縣令者并所選御史亦宜於錄事參軍縣令中簡擇仍須資歷稍深者其有官非累歷才行特堪任用者自布衣已下任所在聞薦委中書門下尚書省考試堪任者不在此限尚書省政理所繫左右丞綱轄攸歸比來百司職事皆廢宜令明徵式令各舉所職百官有論時政得失并任指陳事實具狀進封

必宜切直無諱有司白身人亦宜準此任詣匭使進表朕
將親覽必加擇用朕每思素儉敦以淳風必約嚴章以齊
侈俗其珠玉器玩寶鈿雜繡等一切禁斷諸道攝官頻有
處分一切盡停尚聞因循其弊未革即宜申明舊勅勒停
三年之喪謂之達禮自非金革不可從權其文官自今已
後并許終制一切不得輒有奏請緣大禮應外壇殿行事
者普恩之外更與一子官應在太清宮郊廟諸色職掌者
及冊皇太子行事官撰冊并書文及簡較造冊官普恩之
外三品已上賜爵一級四品已下加一階仍賜勲一轉天

下耆老九十已上版授刺史七十已上版授上佐縣令孝子順孫義夫節婦旌表門閭終身勿事五嶽四瀆名山大川今古聖帝明王忠臣義士宜令所管致祭

改元永泰赦文

叶五紀者建號以體元受四時者布和而順氣天心可見人欲是從爰立大中之道式受惟新之命朕嗣膺下武獲主多方顧以薄德乘茲艱運戎麾問罪今已十年飲至策勲雖兇渠之授首勞師黷武豈人主之用心況乃軍役屢興干戈靡定茫茫士庶斃於鋒鏑噫皇穹以朕爲子蒼生

以朕爲父至德不能以被物精誠不能以動天俾我生靈
擠於溝壑非朕之咎誰之過歟朕所以馭朽懸旌坐而待
曙勞懷罪己之念延想安人之策亦惟羣公卿士百辟庶
寮咸聽朕命叶宣乃力務履清白之道還興淳素之風率
是黎元歸於仁壽君臣一德何以尚茲廼者刑政不修惠
化未洽旣盡財力良多抵犯靜惟哀矜實軫於懷今將大
振綱維益明懲勸肇舉改元之典宏敷在宥之澤可大赦
天下改廣德三年爲永泰元年自永泰元年正月一日昧
爽已前大辟已下罪無輕重已發覺未發覺已結正未結

正繫囚見徒常赦所不免者咸赦除之僕固懷恩戰伐有功訐謀任重不終臣節輒肆姦凶妄誘異蕃同爲不軌朕惟務責己情重舊勲如能翻然來歸必從寬宥其下偏裨等因被驅率不獲已者及所在山谷草竊反側未安者如能束手而來一切並無所問自廣德元年已前天下百姓所欠負官物一切放免在官典腹內者不在免限其百姓除正租庸外不得更別有科率刺史縣令與朕分憂彫瘵之人切須撫字一夫不獲情甚納隍有能招輯逃亡平均賦稅增多戶口廣闢田疇清節有聞課效尤著者宜委所

在節度觀察具名聞奏即令按覆超資擢授其有理無能
政迹涉贓私必當重加貶奪永爲殿累農政本也食人天
也方春之首重於東作除軍興至急餘一切並停令百姓
專營農事其逃戶復業及浮客情愿編附者仰州縣長吏
親就存撫特矜賦役全不濟者量貸種子務令安集孝弟
力田懷才抱器遺逸未經薦達者各委州府聞奏親當策
試量能敘用應見立仗諸軍將士等宜共賜錢五萬貫書
稱咸秩詩美懷柔仰惟衆靈念茲多祐其五嶽四瀆名山
大川宜令所管牧宰精誠致祭中外寮吏各揚其職無或

曠官克副朕意

改元大歷赦文

王者欽若昊天誕受丕命莫不協五紀而乘運稽三微以體元上齊璿衡下立人極乃頒歷於惟歲更覃恩於率土朕嗣守鴻業恭臨寶位頃以時當寇難運屬干戈誓衆興師爲人除害實賴宗社降福寰宇小康用興淳樸之風庶洽雍熙之化乾坤敷祐大庇生靈文武協心同力王室豈朕薄德而臻於此乃者金革所聚綿歷歲時征賦頗繁人猶彫瘵是用疚心疾首當宁而興懷罪以在予馭朽而貽

懼每思宏濟之道用拯黎元之弊月纏星昴律中黃鍾合
天正之符承日至之永祥雲在矚旣當伯趙之司惠澤布
和宜順一陽之氣建元發號革故維新俾及履長之節用
深行慶之典可大赦天下其永泰二年宜改爲大厯元年
自大厯元年十一月十二日昧爽已前大辟罪已下已發
覺未發覺已結正未結正繫囚見徒罪無輕重常赦所不
免者咸赦除之長吏犯贓不在免限夫從簡之道大易至
言薄賦之規前王令範朕志遵儉約務欲息人徵歛無期
誠爲勞弊天下百姓除正租庸及軍器所須外不承正勅

一切不得輒有科率國以人爲本人以農爲業頃繇師旅
征稅殷繁編戶流離田疇荒廢永言牧宰政切親人其刺
史縣令宜以招輯戶口墾田多少用爲殿最每年終委本
道按察使節度等使案覆聞奏如課績尤異當加超擢或
政理無聞必置科貶逃亡失業萍泛無依特宜招撫使安
鄉井其逃戶復業者宜給復三年如百姓先貨賣田宅盡
者宜委州縣取逃死戶口田宅量丁口充給仍仰縣令親
至鄉村安存處置務從樂業以贍資糧王畿之間賦斂尤
重百役供億當甚艱辛亥我疲人良深憫念盍徹之稅著

自周經未便於人何必行古其什一稅宜停周徵俊造漢
辟賢良垂之典謨永代作則天下有安貧樂道孝弟力田
未經薦用者委所在長官具以名聞奏朕當親自策試量
才敘用其立仗將士等定賜物五萬匹五嶽四瀆名山大
川祀典攸存神理昭著宜以禮致祭

大曆八年夏至大赦文

自古帝王順時行令當北至之炎燠應南風之長羸必事
無刑解網申惠敘麥秋之氣而代天理物矣朕獲奉珪璧
虔恭郊廟一紀有餘承累聖之鴻業爲兆人之父母戰戰

兢兢恐不克濟而天地幽贊陰陽化育關輔之內農祥薦臻嘉穀豐衍宿麥滋殖閭閻之間倉廩皆實百價低賤實曰小康此皆上帝報貺烈祖儲祉卿士存誠黎元盡力之效思與萬方百辟咸共樂之而未能也況或抵常憲累然就拘辨對官曹幽閉獄戶永惟械繫之慘追復冒犯之繇皆自王化之未醇風教之多闕俾民忘恥格俗虧禮讓陷在刑典久於狴牢當順陽助生之時積冤蔽感傷之氣百姓有過在予一人顧譊欽恤誠切傷痛用申在宥之旨庶洽惟新之令自大曆八年五月二十五日昧爽已前天下

繫囚見徒及已發覺未發覺已結正未結正死罪並降徒
流已下罪並宜放免敢以赦前事相言告者以其罪罪之
亡命山澤挾藏軍器百日不首復罪如初夫承天之敘則
三時有成自中形外則四海蒙福嗟爾庶士諒悉予懷

大厯九年夏至大赦文

朕誕膺天命以撫方夏兢兢多惕保佑惟人懼庶獄之未
孚俾一夫之不獲思用哀恤與之和寧頃屬夷夏多虞干
戈是務徵賦頗重黎元不康內迫艱窮外乘師旅因行盜
竊自陷典刑纍然園土之下佇勦視陰之命永念愚惑惻

焉疚心而寰宇之間舉類斯衆今火中惟夏長羸及時鬱
然沈繫致傷和氣萬方有罪在予一人將洽至淳之化更
布惟新之理其大厯九年四月二十四日昧爽已前大辟
罪已下已發覺未發覺已結正未結正罪無輕重一切並
宜放免敢以赦前事相言告者以其罪罪之其在軍將士
有刀箭所傷久嬰沈疾者勛力疆場致身鋒刃各委所繇
量給藥物厚加優賞其陣亡將士仰本路隨事優恤妻子
各申錫賚其百姓鰥寡孤獨不能自存者困窮無主誠可
哀傷仰所在州府長官每事以諸色官物量加贍恤令其

得所亡命山澤挾藏軍器百日不首復罪如初在宥之典
既周動植純嘏之錫庶延子孫凡在品類各宜遷善宣示
中外諒悉朕懷

新翻護國仁王般若經序

皇矣至覺子於元元截有海以般若之舟翦稠林以智慧
之劍綿絡六合羅罩十方宏宣也深志廣也大自權輿天
竺泳沫漢庭行無緣之慈納常樂之域信其博施傾芥城
而逾遠仰夫湛寂超言象之又元五始不究其初一得罔
根其本以彼取此何其遼哉朕忝嗣鴻休丕承大寶軫推

溝以夕惕方徹枕而假寐夫其鎮乾坤遏寇虐和風雨著
星辰與物無爲又人艱止不有般若其能已乎嘗澡身定
泉宅心祕道緬尋龍宮之藏稽合鶯峯之旨懿夫護國實
在茲經竊景行於波斯庶闡揚於調御至若高張五忍足
明惻隱之深永祛衆難實惟化清之本名假法假心空色
空推之於無則境智都寂引之於有廼津梁不窮思與黎
烝共臻實相而緹紬貝葉文字參差東夏西天言音訛謬
致使古今翻譯清濁不同前後參詳輕重匪一其猶大輅
終繼事而增華譬彼堅冰始積水而非厲先之所譯語質

未融披讀之流臨文三覆凡諸釋氏良用慨然先聖翹誠
玉毫澹慮真境發揮滿教搜綴缺文詔大德三藏沙門不
空推校詳譯未周部卷三藏學究二諦教傳三密義了宗
極伊成字圓褰裳西指汎杯南海影與形對勤將歲深妙
印度之聲明洞中華之韻曲甘露沃朕香風襲予旣而梵
夾遠賚洪鐘待扣佇延吹萬之籟率訓開三之典朕哀纏
藥棘悲感霜露捧戴遺詔不敢怠遑延振錫之羣英終爲
山之九仞開府朝恩許國以身歸佛以命弼我真教申夫
妙門爰令集京城義學大德良賁等翰林學士常袞等於

大明宮南桃園詳譯護國般若畢並更寫定密嚴等經握
槩含毫研精蹟邃曩者訛略刊定較然昔之沈隱鉤索煥
矣足可懸諸日月大燭昏衢潤之雲雨橫流動植伏願上
資仙駕飛慧雲於四天迥出塵勞躡金蓮於十地朕理昧
幽關文慚麗則見推序述惋撫空懷聊紀之於首篇庶克
開於厥後將發皇永永可推而行之時旃蒙歲木堇榮月
也

密嚴經序

朕聞西方有大聖人焉演不言之言垂無教之教啟迪權

實發披聾瞽遷其善者不疾而速階其益者即聖自凡擊
蒙求于娑婆邱陵示達觀于密嚴世界匪染淨在我實是
非游而楚越生于念中盈缺頓于目下彼魚藏鳥逝其若
是乎欽哉密嚴迹超三有量同乎法界相離于極微非聲
聞之所聞豈色見之能見嘗潔已至妙允恭付囑是欲泉
靜識浪珠清意原窮賴邪能變之端照自覺湛然之境深
詣心極其惟是經夫翻譯之來抑有由矣雖方言有異而
本質須存此經梵書並是偈頌先之譯者多作散文蛇化
爲龍何必變於鱗介家成於國寧即改乎姓氏矧訛略輕

重或有異同再而詳悉可爲盡善大興善寺三藏沙門不
空像教棟梁愛河舟楫戒珠在握明鏡入懷雪涉雲征窮
鹿野之真諦帆飛海宿究馬鳴之奧旨聲該八轉言善兩
方足可窺鑒闕如抑揚了義詔令集京城義學沙門飛錫
翰林學士柳抗等詳譯斯文及護國經等對執貝多翻諸
簡牘憑其本夾依以頌言太羹之味不遺清月之魄恒滿
豈不美歟豈不美歟朕詞乏清華文非迺麗志流衍於祕
蹟將布濩於無窮聊課虛懷序之篇首云爾

欽定全唐文卷五十目錄

德宗一

加郭子儀尚父制

停雜稅制

貶呂渭歙州司馬制

授李泌平章事制

褒恤吐蕃盟會使崔漢衡等制

授范希朝京西行營節度使制

賑貸百姓制

授齊抗兼修國史制

授嘉王運等檢校司空制

貶鄭餘慶郴州司馬制

罷邕府歲貢奴婢詔

禪服終制詔

素服練巾聽政詔

即位求賢詔

刪定條格詔

答令狐峘諫厚奉元陵詔

立宣王爲皇太子詔

定兩稅詔

罷尚書左僕射劉晏領使詔

令天下錢穀歸尚書省詔

遣黜陟使分行天下詔

放張涉詔

上沈皇太后尊號詔

定公主郡縣主出降覲見儀文詔

令舉人指陳事跡詔

賈全等不必避嫌詔

贈郭子儀太師詔

贈李元忠郭昕詔

貶楊炎崖州司馬詔

削奪李惟岳官爵詔

還馬燧家資詔

令曹濮等州休兵詔

禁有司誣搆郭氏詔

贈楊休明等官詔

討李希烈詔

優卹郭子儀諸子詔

欽定全唐文卷五十

德宗皇帝

帝諱适代宗長子天寶元年生至德元年封奉節郡王寶應元年五月進封魯王八月徙封雍王出鎮陝州廣德二年立爲皇太子大曆十四年五月即位建中元年正月上尊號曰聖神文武皇帝在位二十一年年六十四謚曰神武孝文皇帝廟號德宗

加郭子儀尚父制

軒皇致治必資力牧虞舜爲政實賴臯陶苟無師臣豈登

仁壽故呂望輔已成之業指揮致維師之名伊尹出空桑之中翼贊負阿衡之號司徒兼中書令河中尹靈州大都督單于鎮北大都護充關內河東副元帥朔方節度關內支度鹽池六城水運大使押蕃部及管內及河陽道觀察等使上柱國汾陽郡王山陵使食實封一千九百戶子儀氣膺台輔道佐經綸當乾坤交泰之時正君臣定位之禮我肅宗皇帝龍飛靈武翦滅鯨鯢公則揚旆宣威佐清六合我大行皇帝撫軍鞏洛收復都邑公則摧殄諸寇滌穢兩河而又獫狁犬戎共侵涇略公則挺身鋒刃獨立戰場

叱退窮醜威雄七萃塞垣無警社稷永康朕遭閔凶爰在
諒闇公又外釐百揆內舉四維委監山陵克修制度萬樞
倚辦庶績其凝凡所詢謀必竭寅亮敬加從話則率土歡
心寄以緝熙則彝倫式序宏宣五教訓洽生靈光昭七德
威肅禍亂豈周武有尊師之道朕無崇德之名宵衣永歎
夕惕增懷雖年耆益明轅門待鎮然復土寄重留籍倚毗
可加號尚父兼太尉中書令山陵使勲封如故仍加實封
通前滿二千戶每月給一千五百人糧料并給二百匹馬
草料有司備禮以時冊命

停雜稅制

自艱難已來徵賦名目繁雜委黜陟使與諸道觀察使刺史作年支兩稅徵納比來新舊徵科色目一切停罷兩稅外輒別率一錢四等官準擅興賦以枉法論其軍府支計等數準大曆十四年八月七日勅處分

貶呂渭歙州司馬制

呂渭僭陳章奏爲其本使薄訴官名朕以宋有司城之嫌晉有司曹之諱歎其忠於所事亦謂確以上聞乃加殊恩俾膺厚賞迅聞所陳少字往歲已任少卿昔是今非罔我

何甚豈得謬當朝典更厠周行宜佐遐藩用誠薄俗可歛
州司馬同正

授李泌平章事制

自昔元后表正萬邦必兼聽以求聞乃選賢而自輔理亂
之本繫乎其任授之以道將在之人朕嗣守丕圖運逢多
難每虔心至理思致和平夕惕興懷納隍是慮今干戈甫
戢而戎狄爲虞豈誠信所未孚何聲教之不暨是以夢想
良佐庶迪前聞云誰之思朕志先定前檢校禮部尚書陝
虢觀察使李泌山河粹氣道德清英蔚爲禎祥生我王國

夷簡不雜高明有融深厚以致誠直方而可大識窮化本
動會時中謹正居心謀猷允哲自膺分陝累洽嘉聞宜其
入掌中樞內司闕袞贊兩儀之化育貞百度之經綸協和
神人參總廊廟咨爾才實惠於邦家往欽哉式佇成績可
守中書侍郎同中書門下平章事

褒恤吐蕃盟會使崔漢衡等制

乃者吐蕃犯塞毒我生靈俶擾隴東深入河曲朕以兵戈
粗定傷夷未瘳務息戰伐之謀遂從通和之請亦知戎醜
志在貪婪重違修睦之辭乃允尋盟之會果爲隱匿變發

遺宮縱犬羊兇狡之羣乘文武信誠之衆蒼黃淪陷深用
惻然此皆由朕之不明致其至此旣無德於萬衆亦有愧
於四方宵旰貽憂何嗟而及今兵部尚書崔漢衡等皆國
之良士朝之蓋臣嬰繫穹廬眇然異域念其家室雖未周
於屢空錄以息男庶或資於薄俸漢衡宜與一子七品官
司勳員外郎鄭叔矩檢校戶部郎中路沁殿中侍御史韓
弇及大將孟日華辛榮李至言范澄王良賁樂演明陽昔
權交成等各與一子八品官試左金吾兵曹參軍袁同直
榆次尉裴頊及副兵馬使已下各與一子九品官仍並與

正員官餘將士各與一子官仍委本使即具名銜聞奏

授范希朝京西行營節度使制

古之命將帥修封疆在於整軍非以耀武故繕理亭障訓
齊車徒以申國威以固王略非誠節茂著無以分統六師
非勲績彰明無以并護諸將副茲重任實在忠賢特進檢
校右僕射兼右金吾衛大將軍充右街使成紀男范希朝
有貞臣之節有良將之風識達武經學綜兵要臨事能斷
好謀而成嘗領元戎鎮於朔野控河上之塞拒漢南之庭
修其政刑諭以威德士吏向慕裔夷綏懷入覲京師策勲

王府洎司警衛禁旅增嚴直道彌彰嘉庸茂著固可以總
統北路節制西陲成魏絳和戎之勲振晁錯備邊之策俾
異俗率化稽人成功師乘以和烽堠無警懋昭丕績時乃
之休可開府儀同三司檢校左僕射兼右神策京西諸城
鎮行營兵馬節度使勲封如故

賑貸百姓制

朕嗣守丕圖於茲七稔每念萬方所奉惟在一人百姓未
康豈安終食故所以賑贍優貸思致乂安方鎮牧守誠宜
遵奉如有違越委御史臺及出使郎官御史訪察以聞

授齊抗兼修國史制

天工人代緝熙庶績所以達四方之志遂萬物之情王猷以穆在乎宰執君舉必書宏厥史職典領著作允資蓋臣中散大夫守中書侍郎同中書門下平章事上柱國賜紫金魚袋齊抗文合大雅行歸中庸宏道而致遠含章而居業稽三王之法志酌千古之獻言積純粹而外發德輝自明誠而居爲國器擢登密勿每竭訐謨察其忠諒多所宏益以序王道之端辨人事之紀勸懲教化在於春秋錯綜裁成必歸良直以中樞之餘力得東觀之全才思革前愆

允資盛德山甫補闕已彰於匪懈藏文立言佇聞於不朽
修明簡策惟爾之休可兼修國史餘並如故主者施行

授嘉王運等檢校司空制

書載堯典首稱睦族詩歌周德實美維城朕嗣統百王憲
章三代義雖本於敘族道無愧於尊賢式遵舊章爰舉成
命嘉王運循王通恭王通等皆孝敬恭懿敏裕齊莊播蘭
茝之清芬炳珪符之瑞采易凌沛獻詩掩楚元古人素風
造次於是師氏典訓周旋以之固可以超金紫之貴階升
台鉉之崇秩策勲詔爵以寵分茅並可金紫光祿大夫檢

校司空賜上柱國仍依百官例給料錢

貶鄭餘慶郴州司馬制

輔弼之臣百辟是憲苟二其行則黷大猷守中書門下平章事鄭餘慶頃謂忠貞擢居台輔仍乖正直有涉比周棄法弄情公行黨比苟徇邪志頗紊彝倫謫佐遐藩以懲不恪朕擢於不次誠冀效忠乃自速辜亦所難逭凡百君子宜悉朕懷可郴州司馬置同正員

罷邕府歲貢奴婢詔

邕府歲貢奴婢使其離父母之鄉絕骨肉之戀非仁也罷

之

禫服終制詔

朕聞禮貴緣情因心展孝高宗得說其代予言今朝有股肱濟爲舟楫出納惟允足以保邦況荼蓼在懷日時猶淺欲遂權奪抑就公除攀號痛心實所未忍朕將從禫服以終喪紀百辟卿士宜悉哀懷

素服練巾聽政詔

昔高宗諒陰三年舜爲堯禹爲舜亦服喪三年故禮曰三年之喪自天子達是知罔極之恩昊天難報朕虔奉遺詔

又迫於羣議將欲從吉未忍割哀其百僚宜以今月十七日釋服朕以素服練巾銜哀聽政凡百在位知朕意焉

即位求賢詔

天下有才藝尤著高蹈邱園及直言極諫之士所在具以名聞諸色人中有孝悌力田經學優深文詞清麗軍謀宏遠武藝殊倫者亦具以名聞能詣闕自陳者亦聽仍限今年十二月內到朕當親試

刪定條格詔

律令格式條目有未折衷者委中書門下簡擇理識通明

官共刪定自至德以來制勅或因人奏請或臨事頒行差互不同使人疑惑中書門下與刪定官詳決取堪久長行用者編入條格

答令狐峘諫厚奉元陵詔

朕頃議山陵心方迷謬忘遵先旨遂有優厚之文卿聞見該通識達宏遠深知不可切以爲言引古援今依經據理非唯中朕之病兼亦成朕之身今所以令朕免不予之名不遺君親於患者皆卿之力也敢不聞義而從收之桑榆奉以始終期無失墜嗟乎古之遺直何以加卿

立宣王爲皇太子詔

主器者莫若長子繼明者必建儲兩旣以傳重亦以宗本
則君親之大義帝王之宏範無先於此矣朕以眇身纘承
丕緒夕惕祗畏惟懷永圖承八葉之耿光居四海而稱大
則七鬯之主棗盛之重樹元貴嫡有邦之先宣王誦生知
古制旣賢且長聰明敏博溫恭孝友不自滿假率由憲章
慶發高禔兆申甲觀爲子之道惟父能知審其觀志宜承
大統固能總戎監撫載乎鼎寶不絕馳道謙敬益崇問安
必自於因心入學固知其讓齒升茲上嗣庶貞萬國可立

爲皇太子宜令所司擇日備禮冊命

定兩稅詔

戶無主客以見居爲簿人無丁中以貧富爲差行商者在郡縣稅三十之一居人之稅秋夏兩徵之各有不便者三之餘征賦悉罷而丁額不廢其田畝之稅率以大厯十四年墾數爲準徵夏稅無過六月秋稅無過十一月違者進退長吏令黜陟使各量風土所宜人戶多少均定其賦尚書度支總統焉

罷尚書左僕射劉晏領使詔

東都河南江淮山南東等道轉運租庸青苗鹽鐵等使尚書左僕射劉晏頃以兵車未息權立使名久勤元老集我庶務悉心瘁力垂二十年朕以征稅多門鄉邑凋耗聽於羣議思有變更將置時和之理宜復有司之制晏所領使宜停天下錢穀委金部倉部中書門下揀兩司郎官準格式調掌

令天下錢穀歸尚書省詔

朕以征稅多門郡邑凋耗聽於羣議思有變更將制時雍宜遵古制其江淮米準旨轉運入京者及諸軍糧儲宜令

庫部郎中崔河圖權領之今年夏稅以前諸道財賦多輸京者及鹽鐵財貨委江州刺史包佶權領之天下錢穀皆歸金部倉部委中書門下簡兩司郎官準格式調理

遣黜陟使分行天下詔

朕聞唐虞聖人之理三載考績黜陟幽明兩漢施教之君亦命八使澄清天下朕纘承大業思服訓謨雖王公卿士內勤夙夜藩岳守將外盡公忠而兵革未寧戎狄未盡紀綱未振法令未敷封圻郡縣賦稅不一師旅上下勞逸不均所以終宵積憂寤寐增惕爰命羣士往代子言行乎四

方以聽於理舉其百事以歸於正朕之深願可不勤副也

放張涉詔

尊師之道禮有所加議故之法恩有所掩張涉賄賂交通頗駭時聽常所親重良深歎息宜放歸田里

上沈皇太后尊號詔

王者事父孝故事天明事母孝故事地察則事天莫先於嚴父事地莫盛於尊親朕躬承天命以主社稷執珪璧以事上帝祖宗克配園寢永終而內朝虛位闕問安之禮銜悲內惻憂懣終歲思欲歷舟車之路以聽求音問而主茲

重器莫匪深哀是用仰稽舊儀敬崇大號舉茲禮命式遵前典宜令公卿大夫稽度前訓上皇太后尊號

定公主郡縣主出降覲見儀文詔

冠婚之義人倫大經昔唐堯降嬪帝乙歸妹迨於漢氏同姓主之爰自近古禮教陵夷公郡法度僭差殊制姻族闕齒序之義舅姑有拜下之禮自家刑國多愧古人今縣主有行將俟嘉命俾親執棗栗以見舅姑敬遵宗婦之儀降就家人之禮事資變革以抑浮華其令禮儀使與禮官博士約古今舊儀及開元禮詳定公主郡縣主出降覲見之

文儀以聞

令舉人指陳事跡詔

常參官及節度觀察防禦軍使城使兵馬使諸州刺史少尹赤令畿令并七品以下清官及大理司直評事等頃者令内外新授官人三日內上表舉一人自代欲於中選才堪者任用比來所舉少有撫實殊乖素來求才之意自今以後每舉人皆令指陳其承前事跡如有政能行義藝業勞効各分析言之

賈全等不必避嫌詔

功勞近臣至親子弟旣處繁劇或招過犯寬宥則撓法取責則虧恩不令守官仍爲至當賈全等十人昨緣畿內凋殘親自選擇事非常制不令避嫌

贈郭子儀太師詔

天地以四時成物元首以股肱作輔公台之任鼎足相承上以調三光下以象五岳允釐庶績鎮撫四夷體元和之氣根貞一之德功至大而不伐身處高而更安尚父比呂望之名爲師增周公之位盛業可久歿而彌光故太尉兼中書令柱國汾陽郡王尚父子儀天降人傑生知王佐訓

師如子料敵若神昔天寶多難羯胡作禍咸秦失險河洛
爲戎公能扶翼肅宗載造區夏於國有患勞其戡定於邊
有寇藉其驅除安社稷必在於絳侯定羌戎無踰於充國
絳臺綏四散之衆涇陽降十萬之虜勲高今古名警夷狄
而勞乎征鎮二紀於茲頃以春秋旣高疆場多事罷彼旌
鉞寵在台衡以公柱石四朝藩翰萬里忠貞懸於日月寵
遇冠於人臣尊其元老加以崇號期壽考之永養勲賢之
德膏肓生疾藥石靡功人之云亡梁木斯壞雖賻禮加等
輟朝增日悼心流涕曷可弭忘更議追崇名位斯極而尊

爲尚父官協太師雖爵秩則同而體望尤重歛以袞冕旌
我元臣聖祖園陵所宜陪葬式墓表文終之德象山追去
病之勲千載如存九原可作冊命之禮有司備焉可贈太
師陪葬建陵仍令所司備禮冊命賻絹三千匹布三千端
米麥三千石

賜李元忠郭昕詔

二庭四鎮統任西夏五十七蕃十姓部落國朝以來相奉
率職自關隴失守東西阻絕忠義之徒泣血相守慎固封
略奉尊朝法皆侯伯守將交修共理之所致也伊西北庭

節度觀察使李元忠可北庭大都護四鎮節度留後郭昕可安西大都護四鎮節度觀察使其將吏已下敘官可超七資

貶楊炎崖州司馬詔

尚書左僕射楊炎託以文藝累登清貫雖謫居荒服而虛稱猶存朕初臨萬邦思宏大化務擢非次招納時髦拔自郡佐登於鼎司獨委心膂信任無疑而乃不思竭誠敢爲姦蠹進邪醜正既僞且堅黨援因依動涉情故隳法敗度罔上行私苟利其身不顧於國加以內無訓誡外有交通

縱恣詐欺以成贓賄詢其事跡本末乖謬蔑恩棄德負我何深考狀議刑罪在難宥但以朕於將相義切始終顧全大體特有宏貸俾從遠謫以肅具寮可崖州司馬同正仍馳驛發遣

削奪李惟岳官爵詔

李惟岳其父寶臣有忠勞於王室夷險之際猶全誠効而惟岳隳其父業蔑棄國恩纒經之中擅掌戎務矯陳款狀冀邀爵祿外結兇黨益固奸謀不孝不忠宜肆原野朕尚念其前緒容以自新俾護父喪以其屬歸闕待以好爵遇

之如初告諭旣勤罔有悛革蠢爾狂狡自詒滅亡除暴去邪國有恒典惟岳在身官爵並宜削除罪止元凶餘無所問其屬將校能以所部兵馬州縣來降者便授以本職仍加封賞

還馬燧家資詔

忠臣之事君也願隳家以奉國良將之養士也或均財以周惠爰自古昔其儔益鮮故寶嬰陳金於廟廡趙奢散財於部曲皆受之天府不取私門猶能垂名史冊遺芳千載而況執上將之旗鼓率先登之士卒將行命賞罄乃家財

上以彰憂國之誠下以竭奉公之効不有褒美孰旌忠賢
河東節度使馬燧誠美夙著宏略載宣克揚經武之規實
重安人之寄屬河朔干紀磁邢當寇而能忠義奮發奉辭
問罪出師之際宣布明誠誓將資產分給戰士故得三軍
之衆相與感激百勝之績於茲競勸朕當遂其懇懷以成
厥美殊常之迹古人所難繼而行之用明信賞仍班王府
之貨式表忠臣之節宜令度支出錢充給將士其馬燧家
資並却還之

令曹濮等州休兵詔

在昔聖王之御寓也常修文德以勝威武故能協和神人
撫寧方夏蓋有國之令圖也朕自君臨萬邦於茲三載明
發求理中夜靡遑常懼祖宗之威靈顧惟黎元之未洽是
用君臣之際推以腹心賞罰之道俾無僭濫每發一詔施
一令罔不本之以德義後之以威刑期戢五兵思宏七教
庶乎勝殘去殺之理有耻且格之道而眇身薄德肺腑未
親四方諸侯義信猶阻近聞曹濮數州知加兵籍司馬採
聽飛語容納奸謀交質往來邀結外援雖各在封略言備
寇攘而汴郊士庶頗聞驚擾閭井奔散如避寇讎迨茲春

中首種未入朕爲人君父不能以誠明感達股肱之佐不能以慈惠覆育黔黎之類使其骨肉相去情義不通終宵咎責心用震悼亦以社稷之計億兆之命防危慮遠不得不然至於君臣之道進退之理雖以造次顛沛嘗所不忘也是以分命節制及集諸軍於汴宋懷鄭之間使各屯守發令之日且常言誠非有侵軼不令議戰但田里服業農桑及時下無愁怨外絕師旅偃旗臥鼓朕願斯畢於戲惟天地日月實鑒我心山川鬼神尚弼予志布告中外咸令知悉

禁有司誣構郭氏詔

故尚父子儀有大勲力保乂於皇家嘗誓以山河琢之金石十世之宥其可忘也其家前時與人爲市以子儀歿後或被誣構欲論奪之有司無得爲理

贈楊休明等官詔

故河西兼伊西北庭節度觀察使檢校工部尚書兼御史大夫贈太子太保楊休明故河西節度觀察使檢校工部尚書兼侍御史大夫周鼎故西州刺史兼御史中丞李琇璋故瓜州刺史兼御史中丞知河西節度留後張銑或寄

崇方鎮或攝總留務時屬殷憂並抗貞節率勵將吏誓一
其心固守西陲以俟朝命羌戎乘間驟逼城池國家方有
內虞未遑外救河隴之右化爲虜場俾我忠良歿身異域
彌歷年紀以逮於茲旅柩方旋誠深憫悼故遞加寵贈俾
極朝榮式彰茂烈永賁幽壠休明可贈司徒鼎可贈太保
琇璋可贈戶部尚書銑可贈兵部侍郎

討李希烈詔

淮陽軍節度使李希烈頃以梁崇義叛逆使之專征即集
勲庸大加恩禮名極台輔賞延子孫而乃負德棄身去忠

效逆攻劫道路擅固鄧州而又圖陷汴州攘奪尉氏攻圍鄭圃暴犯汝墳已勅神策汴滑河陽東畿汝州淮南山南荆南湖南劔南江西鄂岳等道十五萬衆尅日齊進弔人靖亂罪止元兇有能斬希烈歸降者四品已上以希烈官爵授之五品已上封異姓王實封四百戶諸軍將士斬獲希烈者亦準此例封賞以軍城降者便以其職授之賜其實封賊平後除供當道外百姓給復三年朕德之不明化有不洽未躋仁壽尚勞用兵中心咎悼無忘鑒寐

優卹郭子儀諸子詔

故尚父太尉中書令汾陽王功格上元道光下土積其善
慶垂裕無窮雖嫡長云殂支宗斯盛汾陽舊邑盡有不承
其男前左散騎常侍駙馬都尉食實封五百戶曖夙稟義
方居忠履孝儷崇銀榜攄美金章繼撫先封允宜聽復曖
兄檢校工部尚書守太子賓客趙國公晞并弟右金吾將
軍祁國公食實封二百五十戶曙太子左諭德映等並休
有令名保其先業宜允推恩之典以明延嗣之誠其實封
二千戶宜準式減半餘可分襲曖可襲代國公仍通前襲
三百戶晞可二百五十戶曙可五十戶通前三百七十戶

映可二百三十五戶